

दिनांक 02.12.2025

समय: 18.45 बजे

- मुख्यमंत्री भजनलाल शर्मा आज दिल्ली मांय प्रधानमंत्री नरेन्द्र मोदी अर केई केन्द्रीय मंत्रियां सागे मुलाकात कीनीं
- देश मांय एसआईआर रा दूजा दौर मांय हाल तांई 50 करोड़ 85 लाख ऊं बत्ता मतदातावां ने गणना प्रपत्र बांटी ज्यां
- प्रदेश मांय राजभवन रो नाम बदल र लोकभवन करी ज्यो
- फिरोज़पुर फीडर ने और बेहतर बणावण रा काम री सरूआत 5 दिसम्बर ने करण रो प्रस्तावं

000

मुख्यमंत्री भजनलाल शर्मा आज दिल्ली मांय प्रधानमंत्री नरेन्द्र मोदी सागे मुलाकात कीनीं वे सोशल मीडिया पोस्ट रे जरिये मांड्यो के वे ई महीना राज्य री मौजूदा सरकार रा कामकाज रा दो साल पूरा व्हेवण रे मौके प्रधानमंत्री ऊं राजस्थान पधारण री अरज कीनीं श्री शर्मा प्रदेश भाजपा अध्यक्ष मदन राठौड़ सागे लोकसभा अध्यक्ष ओम बिरला ऊं ई भेंट कीनीं ई सागे ई मुख्यमंत्री गृहमंत्री अमित शाह अर केन्द्रीय मंत्रियां जे.पी. नड्डा, जितेन्द्र सिंह अर राजीव रंजन सागे ई मुलाकात कीनीं

000

मुख्यमंत्री भजन लाल शर्मा री सदरत मांय काल दोपहरां राज्य मंत्रिमंडल री मीटिंग रो कार्यक्रम हैं ई पाछे मंत्रिपरिषद् री मीटिंग ई बुलायी ज्यी हैं मंत्रिमंडल अर मंत्रिपरिषद् री मीटिंग मांय राज्य सरकार रा कामकाज रा दो साल पूरा व्हेवण रा सिलसिला मांय राख्या जावण वाळा कार्यकमां रा बारा मांय चर्चा समेत न्यारा-न्यारा मुद्दां माथे विचार करण रा आसार हैं

000

देश मांय मतदाता सूची विशेष गहन पुनरीक्षण – एसआईआर रा काम रा दूजा दौर रा तैत हाल तांई वोट देवण रा पात्र 50 करोड़ 85 लाख ऊं बत्ता लोगां ने गणना प्रपत्र दे दिया ज्यो हैं आ तादाद ई दौर रा करीब 51 करोड़ मतदातावां रो 99 दशमलव सात-आठ फीसदी हैं प्रदेश मांय ई एसआईआर रो काम जोर-शोर ऊं चाल रह्यो हैं अजमेर दक्षिण विधानसभा क्षेत्र री विधायक अनिता भदेल चुनाव आयोग री ओर ऊं गणना प्रपत्र भरण री तारीख 11 दिसम्बर तांई बधावण रो स्वागत कीनो हैं

.....

विशेष गहन पुनरीक्षण कार्यक्रम रा तैत जागरूक मतदाता आरे-सारे रा लोगां ने ई गणना प्रपत्र भरण सारू प्रेरित कर रह्यो हैं पाली रा रेहवासी किशनराव कह्यो के वोटरलिस्टां ने साफगोई सागे बणावण सारू एसआईआर री प्रक्रिया जरूरी हैं

.....

राज्य मांय सौ फीसदी काम पूरो करण वाळा बूथ लेवल अहलकारां-बीएलओ अर सुपरवाईजर्स रो मान कर्यो जा रह्यो हैं डूंगरपुर मांय ज़िला निर्वाचन अधिकारी अंकित कुमार सिंह ऐड़ा 37 सुपरवाईजरां रो मान कीनो जयपुर मांय जागरूक मतदाता जनतंत्र का प्रहरी मुद्दा माथे निबंध होड़ राख्यी ज्यीं कोटपूतली-बहरोड़ ज़िला मांय जवानपुरा रा पवन शर्मा वोट देवण रा हकदार सगळा लोगां ऊं बीएलओ री मदद करण री अपील कीनीं

000

जयपुर रा प्रदेश भाजपा मुख्यालय मांय आज जनसुणवाई करी ज्यीं ई दौरान उद्योग मंत्री राज्यवर्द्धन राठौड़ अर जनजातीय क्षेत्र विकास मंत्री बाबू लाल खराड़ी जनता री परेशानियां सुणीं खबरनवीसां सागे बातचीत करता थकां उद्योग मंत्री कह्यो के लोगां री समस्यावां अर राय सुणबा री सरकार री जिम्मेदारी हैं

000

राजभवन रो नाम बदल र लोकभवन कर दियो ज्यो हैं ई बारा मांय अधिसूचना जारी कर दीरीजी हैं राज्यपाल कह्यो के 'राज' शब्द ब्रिटिश राज री याद दिरावे है, ई कारण केन्द्र सरकार री पहल ऊं ओ बदलाव करी ज्यो हैं श्री बागड़े कह्यो के भारत दुनिया रो सब ऊं मोटो लोकतंत्र है अर लोकतंत्र

मांय लोक ई खास हैं वे कह्यो के जनता री भावनावां अर लोक उम्मीदां रो प्रतीक मानता थकां इण ने लोकभवन नाम दियो ज्यो हैं

000

राज्यपाल हरिभाऊ बागडे आज लोकभवन मांय उत्तराखंड, झारखंड, नागालैंड अर असम रा स्थापना दिवस समारोह मांय शामिल व्ह्यां ई मौके वे आं राज्यां ऊं आ र प्रदेश मांय रह रह्या लोगां सागे बातचीत कर र स्थापना दिवस री शुभकामनावां दीनीं श्री बागडे कह्यो के लोकभवन मांय न्यारा-न्यारा राज्यां रो स्थापना दिवस मनावण रो मकसद एक भारत-श्रेष्ठ भारत री भावना ने महसूस करणो हैं

000

प्रदेश मांय मुख्यमंत्री मंगला पशु बीमा योजना रा मौजूदा दौर मांय 21 लाख ढांढा-ढोरां रो मुफ्त बीमो करावणो तैय करी ज्यो हैं ई सारू गांवां मांय शिविर लगाया जा रह्या हैं आं शिविरां मांय पशुपालकां ने तुरत ही बीमा रा सर्टिफिकेट देवण री तैयारी करी ज्यी हैं झुंझुनूं रा पशुपालन विभाग रा संयुक्त निदेशक डॉ. शिवकुमार सैनी बतायो के योजना रा तहत दूध देवण वाळा पशुआं रो बीमो कर्यो जा रह्यो हैं वे बतायो के ज़िला मांय 50 हजार ऊं बत्ता पशुआं रो बीमो पहले आओ-पहले पाओ रा आधार ऊं कर्यो जा रह्यो हैं

000

राज्य मांय नहरी तंत्र ने मज़बूत बणावण सारू फिरोज़पुर फीडर ने और बेहतर बणावण रा काम री सरूआत 5 दिसम्बर ने करण रो प्रस्ताव हैं मुख्यमंत्री भजनलाल शर्मा रो ई काम री सरूआत रो कार्यक्रम हैं ई रा तैत आरडी जीरो ऊं 168 दशमलव दो तीन तांई सीसी लाइनिंग, हैड रेग्युलेटर बणावण अर रेल्वे क्रॉसिंग ब्रिज ओजू बणावण रा काम कराया जावेलां इण ऊं हरीके बैराज मांय आवण वाळा बत्ता पाणी ने फिरोज़पुर फीडर मांय लायो जावेला, जिण रो फायदो गंग नहर ने मिलेलां ओ फीडर और बेहतर बणावण ऊं गंग नहर रा 3 लाख 14 हजार हैक्टेयर हलका मांय किसानां ने पाणी मिल सकेलां 647 करोड़ रूप्या ऊं बत्ती रकम रा खर्च वाळी ई परियोजना मांय पंजाब री करीब 379 करोड़ अर राजस्थान री लगभग 268 करोड़ रूप्या री हिस्सेदारी हैं

000

प्रदेश मांय ई महीना मांय 230 माइनर मिनरल ब्लॉक री ई-नीलामी रो काम सरू व्हे ग्यो हैं ई सागे ई चालू माली साल रा आवता तीन महीना मांय करीब 400 माइनर मिनरल ब्लॉक री ई-नीलामी री कार्य योजना बणायी ज्यी हैं खान अर पेट्रोलियम विभाग रा प्रमुख शासन सचिव टी. रविकान्त आज जयपुर मांय आ जाणकारी दीनीं वे बतायो के विभाग खनिजां री खोज रो काम तेज़ कर रह्यो हैं

000

राजसमंद ज़िला रा नाथद्वारा मांय आज पुलिस एक पिकअप ऊं भारी तादाद मांय धमाको करण रा डिटोनेटर अर जिलेटिंग री छड़ां बरामद कीनीं डी.एस.पी. शिप्रा राजावत बतायो के बिना नम्बर री आ पिकअप गाड़ी आमेट ऊं नाथद्वारा जा रही हीं पिकअप रा ड्राइवर अर कंडक्टर ने गिरफ्तार कर र पूछताछ करी जा रही हैं

000

भारत रा सलीम मेघरचा थाईलैंड रा पटाया मांय व्ही विश्व बॉडी बिल्डिंग होड़ मांय चांदी रो तमगो जीत्यो हैं वे डूंगरपुर ज़िला मांय सीमलवाड़ा रा रेहवासी हैं

000

राजस्थान ग्रामीण आजीविका विकास परिषद-राजीविका एक गैर सरकारी समूह सागे आज जयपुर मांय करार कीनो हैं ई माथे राजीविका री स्टेट मिशन डायरेक्टर, नेहा गिरि अर गैर-सरकारी समूह रा निदेशक, अभिषेक पोद्दार सही कीनीं ई रा तैत राजीविका ऊं जुड़ी महिलावां ने उत्पादां मांय सुधार, नुवी डिजाइनिंग अर पैकेजिंग री बेहतर सिखावण दी जावेलां

000

नेशनल हाई-वे माथे हादसा री शंका वाळा हलकां मांय अब पैली ही सुरक्षा अलर्ट मिलेलां ई सारू भारतीय राष्ट्रीय राजमार्ग प्राधिकरण-एन.एच.ए.आई. एक गैर-सरकारी कम्पनी सागे मोबाइल आधारित सुरक्षा अलर्ट सिस्टम लागू करण रो करार कीनो हैं ई रे ज़रिये नेशनल हाइवे माथे जावण वाळां ने हादसा री शंका वाळी ठोड़ां, धुंअर वाळा हलकां, बेसहारा पशुआं री मौजूदगी वाळी ठोड़ां अर मुसीबत री बगत गेला मांय बदलाव री राय सारू एसएमएस, व्हाट्सएप अर फोन रे ज़रिये टेमसर चेताया जावेलां इण ने एनएचएआई रा डिजिटल प्लेटफॉर्म 'राजमार्ग यात्रा' ऐप अर हेल्पलाइन सागे ई जोड़्यो जावेलां

देश मांय साल 2019 मांय सरू करीजी पीएम-किसान योजना रा तैत हाल तांई किसानां ने केन्द्र सरकार री ओर ऊं 21 किशतां रे जरिये चार लाख करोड़ रुप्या ऊं बत्ती रकम दीरीजी हैं कृषि मंत्री शिवराज सिंह चौहान आज लोकसभा मांय एक लिख्योड़ा जवाब मांय आ जाणकारी दीनीं वे बतायो के ई योजना रा तैत काश्तकारां रा खातां मांय हर साल छह हजार रुप्या तीन बराबर किशतां मांय जमा कराया जावे हैं वे कह्यो के लारला महीना देश रा नौ करोड़ ऊं बत्ता किसानां ने पीएम-किसान सम्मान निधि री 21वीं किशत जारी करीजी हीं